

Tusarniaanermut akissutit pillugit allakkiaq

Siunnersuut Naalakkersuisut tusarniaanermi nittartagaanni piffissami 26. april 2026-mit 25. maj 2026 ilanngullugu tamanut saqqummiunneqarnikuuvoq, soorlu aamma siunnersuut piffissami tassani tusarniutigineqarsimasoq ukununnga tulliuttunut:

- Avannaata Kommunia
- Aalisarnermut siunnersuisoqatigiit ilaasortaalu
- Kalaallit Nunaanni Sulisitsisut
- Pinngortitaleriffik
- KNAPK
- Kommune Kujalleq
- Kommuneqarfik Sermersooq
- Kommune Qeqertalik
- Oceans North Kalaallit Nunaat
- QAK
- Qeqqata Kommunia
- Royal Greenland
- SIK
- Sustainable Fisheries Greenland (SFG)
- SQAPK
- Transparency International Greenland
- Pinngortitaq pillugu nunarsuaq tamakkerlugu suliniaqatigiiffik, WWF

Tusarniaanermi piffissaliussap naanerani ukunannga tusarniaanermut akissutinik Naalakkersuisut tigusaqarput, taakkulu tulliuttuni oqaaseqaateqarnissamut tunngaviliisimapput. Tusarniaanermi akissutinut Naalakkersuisoqarfiup oqaaseqaatai uingasumik allanneqarput.

1. Nalinginnaasumik oqaaseqaatit

Tusarniaanermi akissutit arlallit sammisanut arlalinnut tunngasunik assigiimmik isiginnipput, tassunga ilanngullugu pingaartumik aalisarneq pillugu inatsimmi § 54, imm. 2-mi oqaasertaliussat allanngortinneqartut. Sammisanut taakkununnga tusarniaanermi peqataasut isiginninnerat tusarniarneqartuni ataasiakkaani sulii allanneqarsimapput, isiginninnernullu taakkununnga Naalakkersuisut qisuariarnerat assigiikannertussaalluni.

2. Tusarniaanermi akissutit ataasiakkaat

2.1. Avannaata Kommunia

Avannaata Kommuni Aalisarnermut Piniarnermullu Ataatsimiititaliap ataatsimiinnermini aalisarneq pillugu inatsisissatut allannguutissatut Inatsisartut siunnersuutaat 27. april 2026-meersoq suliarisimavaa.

Inatsisissatut siunnersuummut siunnersuutigineqarpoq inatsimmi § 10-mi allassimasoq takuneqarsinnaalluni angallammik piginnittoq kisimi aalisarnermik ingerlatsissasoq, taamaaqataanik angallateqarlutik aalisartunut malittarisassat tulluurtut aalajangersarneqartariaqartut, taamaaqataanillu umiatsiaararsorlutik aalisartut piginnittoq tunisinermi peqataasariaqanngitsoq, taamaalilluni taakku ataatsimoortillugit assigiiaartumillu paasineqarsinnaallutik.

§ 10-ip nutaamik oqaasertalernissanut siunnersuummi angallatinut piginnittunut umiatsiaararsorlutillu aalisartunut malittarisassat assigiiaartut eqqunneqarput, tassa immikkoortut arlaannaalluunniit akuersissummik piginnittoq aalisarnermi nammineq peqataanissaa pillugu piumasaqaateqarunnaarluni.

Aalisarneq pillugu siunnersuisoqatigiinnut siunnersuisunik pilersitsinermi oqaaseq Aalisarnermut attuumassuteqanngitsoq tikkuarneqarpoq. Taarsiullugu siunnersuutigineqarpoq oqaaseq una atorineqassasoq:
(siammasissumik)

2.2. Kommuneqarfik Sermersooq

Kommuni oqaaseqaateqanngilaq.

Naalakkersuisut tamanna tusaatissatut tiguaat.

2.3. Qeqqata Kommunia

Qeqqata Kommuni aalisarnermut piniarnermullu ataatsimiititaliap APA-p ulloq 13. maj aalisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut eqqartorpaa.

Sisimiuni Aalisartut Piniartut Peqatigiiffiata, SAP-ip § 54, imm. 4 pillugu siunnersuutaanut ataatsimiititaliaq isumaqataavoq oqaaseqatigiit uku atorneqassasut: Aalisarneq pillugu Siunnersuisoqatigiit sineriammit tamarmiit KNAPK-mi ilaasortanit inuttalerneqassasoq.

Aalisarneq pillugu Siunnersuisoqatigiinni kattuffiit soqutigisaqaqatigiit peqataanerat pillugu aalajangersakkamut siunnersuummi (§ 54, imm. 5) siunertaq tassaavoq kattuffiit assigiinngitsut ilaasortaanissamut periarfissaqassasut. Aalajangersakkamut nassuiaatinit takuneqarsinnaasutut kattuffiit sorliit tassani pineqarnersut inatsimmi aalajangersimasumik allanneqarsinnaanngimmat, kattuffiit sinniisuusut qaqugukkulluunniit inuiaqatigiinni aalajangersimasumik pingaaruteqartuummata. Kattuffiit taakkulu akornanni pissutsit uummaarissumik ineriartormata piffissap ingerlanerani katitigaanerisa allannqortarnissaat pisariaqarsinnaasarpoq.

Aallaaviatigut sinniisoqarneq kattuffik aqqutigalugu pisarumaarpoq aamma najukkami peqatigiiffiit aqqutigineqartassanngillat.

2.4 Sulisitsisut

Aalisarneq Kalaallit Nunaanni inuussutissarsiutini pingaarnersaavoq aamma sulisoqarnermut, avammut niuernermit inuiaqatigiillu aningaasaqarnerannut aalajangiisumik pingaaruteqarluni. Taamaattumik aalisarneq pillugu inatsimmi allannguinerit inuussutissarsiutip unammillersinnaassusianut, ineriartorneranut aningaasaliinissamullu periarfissanik ikorfartuinermit pingaaruteqarpoq, ilutigalugulu isumalluutiniq piujuartitsisumik aqutsinissaq qulakkeerneqarluni.

Aalisarneq pillugu inatsimmi iluarsiiisoqarnissaa pitsaasuusoq Sulisitsisut isumaqarput. Taamaattorli inuussutissarsiummut erseqqissunik, patajaatsunik siumullu nalunangereersunik sinaakkutit allannguutaasa pilersinneqarnissaat pingaarlutik. Kalaallit Nunaanni pissutsini immikkuullarissuni aalisartoqartarpoq, ilaatigut sikulimmi, nunami isorartoorujussuarmi, killeqartumik attaveqaasersuutilimmi akisoorujussuarmillu assartuiffiusumi. Pissutsit tamakku nunanut allanut toqqaannartumik assersuunneqarsinnaanngillat aamma malittarisassiornermut aqutsinermullu naapertuuttariaqarlutik.

Peqatigisaanik malittarisassanik piviusumik suliaqartunut ingerlataqartunut inatsisit erseqqissuunissaat paasiuminartuunissaallu pingaarput.

Sulisitsisut Aalisarneq pillugu Siunnersuisoqatigiit aamma immikkut ilisimasalittut siunnersuisoqatigiit nutaat, "Aalisarnerup Piujuartitsisumik Ineriartortinneranut Siunnersuisoqatigiit" pilersinneqarneri pillugit allannguutissatut siunnersuutigineqartut immikkut oqaaseqaateqarfiginissaannut pissutissaqarput.

Inatsisissatut siunnersuummut nassuiaatini takuneqarsinnaavoq maannakkut Aalisarneq pillugu Siunnersuisoqatigiit sulinertik ingerlatiinnassagaat. Peqatigisaanik § 54 allanngortinneqarpoq, taamaalilluni Aalisarneq pillugu Siunnersuisoqatigiit oqaaseqaataannik pissarsiniarnissamut Naalakkersuisut pisussaaffeqarunnaarlutik, taamaallaalli oqaaseqaatit pillugit siunnersuisoqatigiit "qinnuigisinnaallugit".

Sulisitsisut isumaqarput taamatut allannguneq nangaanartoqartoq, piginnaasallu killilersorneqarnerinut akerliulluni.

Aalisarneq pillugu Siunnersuisoqatigiit ullumikkut inuussutissarsiutip, kattuffiit aqutsisullu akornanni oqalliffiuvoq pingaaruteqartoq. Siunnersuisoqatigiit inuussutissarsiummi sulilluni misilittakkanik ilisimasatigullu ikiuupput aamma oqartussat inuussutissarsiummilu ingerlataqartut akornanni pitsaannerusumik paaseqatigiinnermik pilersitseqaataallutik. Taanna aalisarnermi immikkut pingaaruteqarpoq, aalajangiinerit amerlanertigut suliatigut aningaasaqarnikkullu assut kinguneqartarmata.

Aalisarneq pillugu Siunnersuisoqatigiit aqutugalugit ingerlataqartut assigiinngitsut inuussutissarsiummi ulluinnarni sulinermiit misilittakkanik, ilungersunartunik ajornartorsiutinillu saqqummiussinissamut periarfissaqartarput. Tamanna aamma suleqatigiinnermi oqalliffinni allaniit misilittakkanut atuuppoq assersuutigalugu Sustainable Fisheries Greenland (SFG) suliniutinullu assigisaannut.

Aalisarneq pillugu Siunnersuisoqatigiit aamma ingerlataqarlutik attuumassuteqartut katersorsinnaasarpai aamma aalisarnermi ajornartorsiutit aalajangersimasut pillugit suleqatigiissitanik pilersitsisinnaarluni, taamaalillunilu pingaaruteqartumik aamma atuuffeqarput. Tamanna assersuutigalugu tassaavoq ajornartorsiutit inuussutissarsiortut, Pingortitaleriffiup imaluunniit Naalakkersuisoqarfiup erseqqinnerusumik qulaajaaffiginissaanik kissaatigineqartut, aamma kingusinnerusukkat inatsisinut, nalunaarutinut, aqutsinermi pilersaarutinut imaluunniit aalisarnermik ulluinnarni aqutsinermut pingaaruteqarsinnaasut.

Taamatut sulinermut qanittumik oqaloqatigiinneq taamatullu suleqatigiinneq piujuartitsisumik aalisarnerup ineriartortinneranut pingaaruteqarpoq. Sulineq akuttunngitsumik ulluinnarni aalisarnermi misilittakkanik aalajangersimasunik tunngaveqartarpoq aamma misissueqqissaarnernik aningaasarsiornikkullu ilusilianik taamaallaat tunngaveqarsinnaanani.

Sulisitsisut taamaattumik isumaqarput Aalisarneq pillugu Siunnersuisoqatigiit suli tassaassasut inuussutissarsiutip, oqartussat ingerlataqartullu allat akornanni oqallinnermut suleqatigiinnermullu nukittuutut pimoorussisutullu katersuuffiussasut. Sulineq taanna immikkut ilisimasallit siunnersuisoqatigiit attaviitsut taamaaqataanik kivissinnaanngilaat, tassa immikkut ilisimasalittut siunnersuisoqatigiit pissusissamisoortumik allatut inissisimassammata sulinermilu allamik tunngaveqartussaallutik.

Taamaattumik pingaarpoq Aalisarnej pillugu Siunnersuisoqatigiit sulii suliaqartutut atornejarnissaat aamma aalisarnej pillugu politikip ineriartortinneqarnerani inuussutissarsiummilu malittarisassaqaqtitsinermini aqqissugaasumik ilaatinneqarlutik.

Peqatigisaanik Sulisitsisunit ernumassutigineqarpoq Aalisarnej pillugu Siunnersuisoqatigiit tusarniarnissaanut pisussaaffimmit taamaallaat siunnersuisoqatigiit tusarniarnermi periarfissaqarnermut allanngutiq inuussutissarsiortut ilaatinneri assut sanngiillisinneqassasut. Piffissap ingerlanerani Aalisarnej pillugu Siunnersuisoqatigiit killeqarnerusumik inissisimalernissaat annerusumillu aalajangiinernut tunngavinnik piviusumik sunniuteqarunnaarnissaat aarlerinarsinnaavoq. Taamaattumik aalisarnej pillugu siunnersuisoqatigiit aamma Naalakkersuisut, taamaalillunilu ingerlatsiviup akornanni suleqatigiinnermik eqaannerulersitsinermik siunnersuut sammiveqanngilluinnarpoq. Ingerlatsiviup silarsuarmut piviusumut paasisaqarnissaanut taanna aqqutissatuaavoq.

Peqatigisaanik aalisarnermi aningaasaqarnermut pissutsit aamma aalisarnerup ineriartornerani pissutsit pillugit siunnersuisutut ilisimasalinnik siunnersuisoqatigiinnik nutaanik pilersitsisoqarnissaa siunnersuutigineqarpoq. Sulisitsisut pingaaruteqartutut isigaat siunnersuisoqatigiit taamatut ittut inuussutissarsiummik maannakkut oqaloqateqartarnej taarsissanngikkaat imaluunniit sanngiillisissanngikkaat.

Immikkut ilisimasalittut siunnersuisoqatigiit misissueqqissaarnernik suliatigullu naliliisarnikkut ikuiussinnaapput, kisinni Kalaallit Nunaanni aalisarnej aningaasarsiornikkut ilusiliatigut atuagarsornikkullu misissueqqissaarnikkut taamaallaat paasineqarsinnaanngilaq. Aalisarnej silap pissusaanik, sikoqarneranik, assartuinnermik, attaveqaasersuuteqarnermik, ukiup ingerlanerata nikinnerinik, sulisinnaasunik niuerfinnullu periarfissaqarnerinik annerusumik sunnerneqarsimasarpoq. Taamaattumik inuussutissarsiortunik ingerlataqartunillu, ulluinnarni pissutsinik toqqaannartumik ilisimasaqartunik qanimut oqaloqateqarnissamik sulii pisariaqaqtitsisoqarpoq.

Sulisitsisut isumaqarput aamma pingaaruteqarlunnartuusoq immikkut ilisimasalittut siunnersuisoqatigiit sulinerat, paasissutissat tunngavii innersuussutillu pillugit ammasumik pissuseqarnej qulakkiissallugu. Siunnersuisoqatigiit naliliinerat inuussutissarsiummut assut pingaaruteqarsinnaasarpoq, sulinerlu taamaattumik matoqqasumik paasisaqarsinnaannginnermillu aqqissuussaananii aamma inuussutissarsiortunik oqaloqateqarnissamik periarfissaqarani ingerlasariaqanngilaq.

Sulisitsisut allannguutissanut ataasiakkaanut oqaaseqaataasa ataani Naalakkersuisut taakkununga oqaaseqaataat atuarneqarsinnaapput.

Allannguutissatut siunnersuutitut ataasiakkaanut oqaaseqaatit

§ 3, nr. 15 – ”piareersaanerup” nassuiaataa pillugu

Nassuiaatip "piareersaaanerup" iluarsineqarnissaata pisariaqartinneranut Sulisitsisut paasinnipput, taamaalilluni qerititsineq taaguummumut ilaajunnaarluni. Allanguineq tunisinermut avataasiorlunilu aalisarnermut attuumasuni ajornartorsiortitsisunut aalajangersimasunut tunngasuuvuq.

Taamaattorli pingaarpoq Kalaallit Nunaanni nunami tunisassiornermut naleqalersitsinermullu kajumissaatinut siunertaanngitsumik allanguut sanngiillisitsisanngitsoq. Aalisarnermik inuussutissarsiuteqartut nammineq aqussinnaasaannik tulluarsarsinnaanermut periarfissiisoqartariaqarpoq.

Naalakkersuisut isumaqarput siunnersuut aqqutigalugu malunnaatilimmik tulluarsarsinnaanermut periarfissiisoqartoq, aamma inuussutissarsiortut namminneq tulluarsinnaaneq taanna iluaqutigerusukkunikku iluaqutigisinnaavaat. Siunnersuut iluaqutigalugu pisat angallammi qeritinneqassanersut imaluunniit sikulersorneqassanersut inuussutissarsiortut namminneq nalilersuisinnaalissapput, soorlu aamma tulaassinerit nunami suliffissuit peqatigalugit eqaannerusumik ataqatigiissaarneqarsinnaalissapput.

§ 5 aamma § 3, nr. 27 – nakkutilliinermi oqartussaq pillugu

Allanguutit siunnersuutigineqartut annerusumik teknikikkut oqaatsitigullu iluseqartutut nalilerneqarput. Sulisitsisut pingaartutut isumaqarput nakkutilliinermi oqartussat akornanni akisussaaffiit agguarneri suli erseqqinnerusariaqartut inuussutissarsiummillu ingerlataqartunit paasiuminarnerusariaqarlutik.

Oqaaseqaatit taakku Naalakkersuisut tusaatissatut tiguaat.

§ 10, imm. 1 – inuttut pegataanissaq pillugu piunasaqaatip atorunnaarsinnera pillugu

Sulisitsisut naliliipput allanguut umiatsiaararsorluni aalisarnermi annerunerusumik eqaallisaanermut pitsaanerusunillu aningaasalersuinissanut aningaasaliinissanullu periarfissiisinaasoq. Tamanna inuussutissarsiutit ineriartortinneranut nutarterneqarneranullu ikorfartuisinnaavoq taamaalillunilu unammillersinnaassuseq nukittorsarsinnaallugu.

Peqatigisaanik ineriartorneq qanimut malinnaaffigineqartariaqarpoq, taamaalilluni inatsimmi siunniussamut ataqatigiissinneqarsinnaanngitsut pissutsit naleqqutinngitsut pinaveersaartinneqarlutik.

Oqaaseqaatit taakku Naalakkersuisut tusaatissatut tiguaat.

§ 32, imm. 8 – Inatsisartut ilisimatinneqarneri pillugu

Inuiaqatigiinni aningaasaqarnikkut assut kinguneqarsinnaasunik aalajangiinerit pillugit Inatsisartut immikkut ilisimatinneqartarnissaat pitsaasutut nalilerneqarpoq. Tamanna ammasumik pissuseqarnermut politikikkullu tunngaveqarnermut ikorfartuivoq.

Oqaaseqaatit taakku Naalakkersuisut tusaatissatut tiguaat.

§ 33, imm. 1, nr. 4 – Tunumi qalerallinnissamut piffissaliisarneq pillugu

Siumut nalunannginnerusumik inuussutissarsiummullu aningaasaliisinnaanermik siunissamullu ungasinnersumut pilersaarusiorsinnaanermik tunngaviit pitsaanerulersinneqartut piffissap pisassiiffiusup ukiunut qulinut aalajangersarneqarnerani naliliisoqarpoq.

Oqaaseqaatit taakku Naalakkersuisut tusaatissatut tiguaat.

§ 54 – Aalisarneq pillugu Siunnersuisoqatigiit pillugit

Sulisitsisut Aalisarneq pillugu Siunnersuisoqatigiit sulinerisa ingerlaannarnissaa pitsaanerussasoq isumaqarput. Siunnersuummili takuneqarsinnaavoq Aalisarneq pillugu Siunnersuisoqatigiit Naalakkersuisunit peqquneqarlutik oqaaseqaateqartassanngitsut, taamaallaalli "oqaaseqarsinnaasut" allaqqalluni.

Allannguineq taanna assut ernumalersitsivoq.

Aalisarneq pillugu Siunnersuisoqatigiit tassaapput inuussutissarsiortut oqartussallu akornanni oqalliffik pingaaruteqartoq aamma aalajangiinerit amerlanernut tunnganerusumik sulinerimullu qaninnerusumik tunngaveqartumik pisinnaaneritut iluaqutaasarluni. Peqatigisaanik Siunnersuisoqatigiit inuussutissarsiortut ilaasa assigiinngitsut aamma ingerlatsiviup akornanni ataqatigiissaarinnermut, misilittakkanik paarlaasseqatigiinnermut akaareqatigiittumillu paaseqatigiinnermut pingaaruteqarluni oqallittarfittut atuuffeqarpoq.

Tamatuma saniatigut Aalisarneq pillugu Siunnersuisoqatigiit aamma ingerlataqartut attuumassuteqartut katersorsinnaaneritut aamma aalisarnermi ajornartorsiutit aalajangersimasut unammilligassallu pillugit suleqatigiissitanik pilersitsisinnaanerminnut periarfissaqarput. Inuussutissarsiortut, Pingortitaleriffiup imaluunniit Naalakkersuisoqarfiup ajornartorsiutit erseqqinnerusumik qulaajaaffigineqarnissaannik imaassinnaasoq pisariaqartitsisut, aamma kingusinnerusukut inatsisinut, nalunaarutinut, aqutsinermi pilersaarutinut imaluunniit aalisarnermik ulluinnarni aqutsinnermut taakku pingaaruteqarsinnaasarput.

Taamatut sulinnermut qanimut malinnaaneq piujuartitsisumik aalisarnerup ineriartortinnissaanut pingaaruteqarpoq aamma suliaqartuulluni immikkut ilisimasalittut siunnersuisoqatigiinnit assinganik isumagineqarsinnaanngilaq.

Sulisitsisut taamaattumik isumaqarput Aalisarneq pillugu Siunnersuisoqatigiit inissisimanerat suli nukittusariaqartoq pisussaaffiusariaqartorlu. Malittarisassaliorneq, pisassiissutit, aaqquissuussat ineriartorneri aamma inuussutissarsiummi sinaakkutitigut atukkat pillugit

malunnaatilinnik allannguinerit pineqartillugit Aalisarneq pillugu Siunnersuisoqatigiinnik Naalakkersuisut tusarniarnissaminut pisussaaffeqarnerat aalajangiussimasariaqarpoq.

Aalajangersakkami imm. 2-mi takuneqarsinnaasutut sammisat tunngaviusut pillugit Naalakkersuisut Aalisarneq pillugu Siunnersuisoqatigiinnut ilisimatitsissaaq, aamma imm. 3 malillugu siunnersuisoqatigiit namminneerlutik sammisanik suliaqarsinnaallutik taakkulu pillugit oqaaseqaateqarsinnaallutik. Siunnersuisoqatigiit oqaaseqaateqarnissaannut periarfissaaq taamaalilluni millineqanngilaq tamannalu tunngavigalugu Naalakkersuisut isumaqanngillat siunnersuut siunnersuisoqatigiit piginnaasaannik killilersuisoq - tamannalu siunertaasimanani.

Naalakkersuisut tusarniaanermi akissutit tiguneqartut tunngavigalugit inatsimmi oqaaseqatigiit attatiinnarniarlugit aalajangerput, taamaalillunilu siunnersuisoqatigiit oqaaseqaateqarnissaannik qinnuiginninneq tunngaviusumik pisussaaffiulerluni.

§ 54 a - Aalisarnerup Piujuartitsisumik Ineriartortinnissaanut Siunnersuisoqatigiit pillugit
Aalisarnerup ineriartortinera pillugu suliatigut siunnersuinerup nukittorsarneqarnissaanik kissaateqarneq pitsaasuusoq Sulisitsisut isumaqarput.

Taamaattorlu pingaaruteqarpoq:

- siunnersuisoqatigiit sulinerat innersuussutaallu pillugit ammasuunissaaq qulakkeerneqartariaqarpoq,
- siunnersuisoqatigiit katitigaanerat suliatigut immikkut ilisimasalinnut sulinikkullu misilittagaqartunut naapertuuppoq,
- Kalaallit Nunaannut immikkut ilisimasat assut pingaartinneqarput,
- siunnersuisoqatigiit inissisimanerat inuussutissarsiortut oqartussallu akornanni maannakkut oqaloqatigiinnerup sanngiillisinneqarneranik kinguneqassanngilaq.

Peqatigisaanik Sulisitsisunit oqaatigissallugu pingaarluni immikkut ilisimasalinnik attaviitsunik peqatigisaanillu Kalaallit Nunaanni pissutsinik aamma aalisarluni sulinermi piviusut pillugit isumaarinnilluartunik nassaarnissaaq ilungersunartuusinnaasartoq.

Naggasiullugu aalisarneq pillugu inatsisip ineriartortinnerani inuussutissarsiortut qanimut suli oqaloqatigineqartarneri aamma Kalaallit Nunaanni inuussutissarsiortunit atugai immikkuullarissut ataqqillugit pisarnissaa pingaaruteqartuusoq Sulisitsisunit erseqqissaatigineqassaaq.

Sulisitsisut ilungersunartunik naliliinerannik Naalakkersuisut isumaqataapput, kisiannili immikkut ilisimasalittut siunnersuisoqatigiit pilersinneqarneri immikkut pingaaruteqartutut isigaat. Tamanna tunngavigalugu Naalakkersuisut isumaat tassaavoq sapinngisamik pitsaanerpaamik piginnaasaqartunik ilaasortat katiternissaasa angunissaanut sukumiisumik sulisoqartariaqartoq.

2.5. KNAPK

Kalaallit Nunaanni inuussutissarsiutit pingaarnersaat pillugu inatsisip allanngortinneqarnera pillugu tusarniaanermut tunngasunik KNAPK imatut isumaliuteqarpoq. Tusarniaaneq namminermit ajunngilaq, kisianni nammineq pigisanik pisassiiffiusumi sinerissamut qanittumi qaleralinniarnermi taakkununga pisassiissutit ikilisinneqarnissaanut periarfissaq amigaatineqarpoq, tassanilu pineqarluni § 35 aamma § 39, imm. 4, soorlu aamma 75 %-imik ikililerisinnaanermut ammanissaq pisariaqartoq, aamma taassuma allannguutissatut siunnersuummi amigaataanera KNAPK-mit assut pakatsissutigineqarput.

Pisassiissutimmi qularnaveeqqutitut ajorluartumik atorneqarsinnaanngillat, tamannalu pissutigalugu ima inissisimalerataannaavutit; ukiup naanerani pisassiissutit 75 %-ii tamakkerlugit aalisarsimanngikkukkit, piffissami ukiuni pingasuni aalisarsinnaanngisatit tunisariaqalissavatit. Sarfaq kissartoq avannarpasinnerusumut ukiuni kingullerni apuuttalersimavoq, tamatumalu kingunerisaanik saarulliit sammineqarnerulersimallutik. Tamannalu ima aammaarluni kinguneqarpoq qalerallit ikinnerusut aalisarneqartarlutik, taamaattumik KNAPK-miit uparuaqqikkusuppugut § 35-ip aamma § 39, imm. 4-ip allanngortinneqarnissaannik sakkortuumik kissaateqarluta.

Aalisarnek pillugu inatsimmi §§ 35 aamma 39 inatsisip allanngortinnissaanut maanna siunnersuummut atatillugu naliliiffigeqqinneqanngillat.

Atuinissamut pisussaaffimmut tunuliaqutaasoq, aalajangersakkanut taakkununga tunngasoq, tunngavik tassaavoq inuiaqatigiit isumalluutiniq atuinissaminnik pisariaqartitsineri. Pisat aalisartuni nunamilu suliffissuarni sulisoqarneranik qulakkeerinnipput, soorlu aamma ingerlataqartunut tamanut isertitaqarnermik qulakkeerinnittut taamaalillunilu inuiaqatigiit kaaviiaartitaannik akileraarutitigullu isertitaqarnissamik qulakkeerinneqataasut. Taamaattumik Naalakkersuisut isumaqarput inuiaqatigiit isumalluutiniq iluaqutissatut tunniussaannik ingerlataqartut atuinissaannik uagut inuiaqatigiittut piumasaqaaterput pingaaruteqarluinnartuusoq.

Tusarniaanermut atortumut naleqqiullugu:

Siullermik oqaatigineqassaaq allannguutissatut siunnersuummi pissutsit arlallit KNAPK-mit maluginiarneqarsimasut. Taakku oqaaseqatigiit inatsisissamut siunnersuummi paatsoorneqarsinnaasut akornanniipput, pisarialimmik allanngortinneqartariaqartut, naak inatsisip allanngortinnissaanut siunnersuummi nassuiaatinilu eqqortumik allassimagaluartut, tassanilu pineqarpoq § 10-mi oqaasertaliussat, imatut allanneqarsimallutik paatsoorneqartut.

Ima allassimavoq, **issuaaneq:**

§ 10, imm. 1, ima oqaasertalerneqassaaq

"§ 10. Akuersissut ingerlatsisumut aalajangersimasumut angallammik aalajangersimasumik pigisalimmut atulersinneqassaaq, tak. § 9.

Akuersissummik piginnittoq kisimi angallat atorlugu aalisarnermik ingerlatsinissamut pininnaatitaavoq."

Issuaaneq naavoq

Taamatut oqaasertalerneqarnera ima paasineqassaaq; akuersissummik piginnittoq aalisarnermi/tunisineri najuutissasoq.

Naalakkersuisut ilisimavaat tusarniaanermi atortut nassiunneqartut kalaallisut allassimasut kukkuneqartut. Kukkuneq taanna maannakkut iluarsineqarpoq.

Inatsisissatut siunnersuummi oqaasertat inuussutissarsiutigalugu umiatsiaararsorluni aalisartunit tigulluarneqaraluartut, nassuiaatini atuarneqarsinnaavoq siunnersuut KNAPK-mit tapersersorneqanngitsoq.

KNAPK sooq taamatut isumaqarpa? Nassuiaatinit takuneqarsinnaasutut ingerlatseqatigiiffinnut angisuunut umiatsiaararsorlunilu aalisartunut atukkat naligiissinniarneqarput, tamannalu KNAPK-p ernumaneranut tunngaviuvoq.

Ernumassutaasoq tassaavoq ingerlatseqatigiiffiit angisuut umiatsiaaqqanik pisiortorsinnaaneri taakkulu inuttalersorlugit, taamaalilluni umiatsiaararsorluni aalisarnermik piviusumik inuussutissarsiuteqartut sakkortuumik unammillerneqalersinnaapput. Minnerunngitsumik umiatsiaararsorluni aalisartut inuttaqarnissamut periarfissaat assut innarlerneqassaaq, taannaavorlu inatsisiliornikkut aarlerinartuusinnaasoq, aalisartunut namminersorlutik inuussutissarsiuteqartunut ajoqusiisinnaasoq KNAPK-mit isumaqatiginngisarput.

Uagut KNAPK-miit aamma isumaqarpugut inatsisiliornikkut ukiuni arlalinni tunisineri akinik naqitsinissamut ammaassisoqassasoq, naak tamanna siunertaanngikkaluartoq, tassa tunitsiviit ukiuni arlalinni akornanni pilersuineq pissutigalugu akit qaffannissaat pisariaqalersimammat, tunitsiviit imminnut pilersornissaannut periarfissanik ammaassisoqarnera pissutigalugu.

Tusarniaanermi atortup saqqaa atuaannarlugu umiatsiaararsorluni aalisartut KNAPK-mi ilaasortaasut tusaaneqarsimanerini isumaqarnarmat isumakkeerfiginnittoqarsinnaasorinarpoq, aamma inuttut allanik isumagisassaqaaraanni aalisarianninneq maannakkut naammagineqarsinnaasutut isikkoqarpoq, tamannali (inatsisissatut siunnersuutaagunartoq - oqalutsi) kikkunntut tamanut atuutsinneqalernera, aamma aalisarfiusunik atuisut ingattajaartumik amerlineqarsinnaanerinit ammaassisoqarnera pillugu nassuiaatit atuernerini akuersarneqarsinnaanngitsumik allanngoriasaarpoq.

Aalisarneq pillugu inatsimmi § 10, imm. 1-ip allanngortinnissaata siunnersuutitaanut tunuliaqutaasoq tassaavoq inatsisip maannakkut oqaasertaasa angallatit malittarisassannik assigiinngitsunik aalajangersaapput, siullertut 6 meterinik takinerusunilluunnit malittarisassat aappaattullu angallatit 6 meterinik naannerusut malittarisassiunneqarlutik. Taamatut assigiinngisitsineq naapertuutinngitsuliornertut Naalakkersuisut isumaqarfigaat.

Allannguuteqarnermi aamma qulakkeerneqarpoq, aalisartut akuersissutaatillit, pissutsinik assigiinngitsunik soorlu nappaammit, ilaqutariinnik unammillertunit il.il. nammineq aalisaqataanissamut akornuserneqartut, akuersissutaatertik atorsinnaaginassavaat

akuersissummik inuup allap aalisartinneratigut tunisitinneratigullu. Tamanna pingaartumik PNNP-mik aalisarnermik sulialinnut atuuppoq, allannguinermi tunngavilersuutit qulaani taaneqartut pissutigalugit atuisinnaaneq tamakkerlugu atorsinnaatinnagu pisassat ilaasa annaaneqarnerisigut taamatut inissisimalernissaq pinngitsoorniarlugu. Allannguineq pivoq Ilulissani umiatsiaararsortut kissaataat naammassiniarlugu.

Taanna maannakkut siunissamilu umiatsiaararsorluni aalisartunut taamaallaat atuutissappat, qularnanngitsumik siunnersuut tapersersorneqarsinnaassaaq.

Allannguuit – taanna akuerineqassaguni – maannakkut siunissamilu umiatsiaararsorluni aalisartunut taamaallaat atuutissaaq. Ingerlataqartut arlaannaalluunniit pisassiissutini pigisani tuninissaannut pisussaatinneqanngilaq taamaalilluni aalisarnermiit anilluni.

Aappaatigullu ingerlatseqatigiiffiit angisuut aningaasalersuinemikkut inunnut ataasiakkaanut sakkortuumik pituttuinerat pinngitsoortinneqarsinnaalissaaq. Pisortat imaluunniit aningaaseriviit sinerissamut qanittumi aalisartunut aningaasalersuinissaq eqqussinnaappassuk, aalisarnermik inuussutissarsiuteqartut tunitsivinnut pituttunngikkaluarlutik ineriartorsinnaagaluarput inuiaqatigiillu aningaasalersorneqarnerinut malunnaatilimmik pilersitsisoqassalluni.

PNNP-mik aaqqissuussineq atuutilersinneqarpoq aalisarnerup aningaaserivinnit aningaasalersorneqarnissaanik tunngavissiniarluni. Pisassiissutitut pigisat piumaneqassappata aaqqissuussineq ingerlallualissaaq, taamaalillunilu pisassiissutitut pigisat qularnaveeqqusiullugit aningaaseriviit taarsigassarsitsisinnaalissapput, taakku naleqarmata.

§ 54 pillugu

Inatsisitigut tunngaveqartumik siunnersuisoqatigiinnik pilersitsinissamut Naalakkersuisut sooq siunertaqarnerat KNAPK-mit paasiuminaatsinneqarpoq, tassami aalisarnek pillugu siunnersuisoqatigiinnik peqareermat, takuneqarsinnaallunilu tassani suliarineqartussat suliassat aalajangersarneqalersut, KNAPK isumaqarpoq maannakkut siunnersuisoqatigiit taakkuninnga suliaqareersut, nutaallu naleqarnerulersitsineq pillugu pissutsinut taamaallaat tunngarpassilluni, tamannalu soqutiginarsinnaalluni.

Takuneqarsinnaavoq attaviitsunik, kattuffinniit ilaasortaqaqartumik immikkut ilisimasalinnik siunnersuisoqatigiinnik pilersitsinissaq siunertarineqartoq, allaassutaasutullu eqqaaneqartoq tassatuaalluni nakkutilliisut pinngortitaleriffiullu peqataannginnissaat eqqaaneqarmat, aqutsisunilu kattuffiit akuliutissanngitsut, aqutsivinnilli pilersitserusuttoqarnersoq inatsimmiit erseqqissumik takuneqarsinnaanani. Naalakkersuisunut siunnersuuteqartussanik/innersuuteqartussanik immikkut ilisimasalinnik siunnersuisoqatigiinnik pilersitsinissaq pillugu siunnersuut ersernerluttutut KNAK-mit isumaqarfigineqarpoq, aamma kattuffiit sinniisuisa saniatigut "immikkut ilisimasallit" kikkuunersut erseqqissumik takuneqarsinnaanani. Allannngilaq sattaaserneqarsimasugut, naluarpummi immikkut ilisimasalittut siunnersuisoqatigiit qanoq katitigaassanersut aamma siunissami qassiussanersut.

Immikkut ilisimasalinnik siunnersuisoqatigiinnik pilersitsineq naalackersuisoqatigiinnermik isumaqatigiissutip aamma Naalackersuisuni partiit akornanni pingaaruteqartunut ilaavoq. Tunuliaqutaasoq tassaavoq inuussutissarsiummut, nunap taamatut assut pinngitsoorsinnaanngisaanut naleqqiullugu aalajangiinerit sapinngisamik pitsaanerpaamik tunngaveqarnissaannik kissaateqarneq. Taamatut tunngavimmik pilersitsisinnaanermut pingaarpoq soqutigisaqatigiinniit isummersuutininik tigusinissaq, taamaaqataanilli assut pingaaruteqarluni immikkut ilisimasallit attaviitsut ilanngussisarnissaat.

Assersuutigalugu sammisat siunnersuisoqatigiinni suliarineqarsinnaasut tassaapput

- Pisassiissutit tamarmiusut,
- nunani tamalaani isumaqatigiissutit,
- Kalaallit Nunaata oqartussaaffiata avataani aalisarnek,
- aalisarnerup nalinginnaasumik malittarisassatigut aqunneqarnera,
- angallatinut nutaanut/allanngortinneqartunut periarfissat pillugit malittarisassat,
- utertitsisussaataaneq,
- pisassiissutinit pigisanik oqartussat tunisinerat,
- aalisarnermut piumasaqaatitut tunitsiviit pillugit piumasaqaatit, aamma
- piujuartitsinissaq siunertaralugu teknikikkut iliuusissat

Sammisat immikkut ilisimasallit siunnersuisoqatigiinnit suliarinerannut naleqquttuusinnaaneri pillugit Naalackersuisut isumaqataapput.

Naatsumik oqaatigalugu KNAPK isumaqarpoq, immikkut ilisimasalinnik siunnersuisoqatigiit nutaat pillugit siunnersuummik saqqummiussinissamut taarsiullugu Aalisarnek pillugu Siunnersuisoqatigiit atuuttut nukittorsarneqassasut.

Immikkut ilisimasalinnik siunnersuisoqatigiinnik pilersitsineq naalackersuisoqatigiinnermik isumaqatigiissutip aamma Naalackersuisuni partiit akornanni pingaaruteqartunut ilaavoq. Tunuliaqutaasoq tassaavoq inuussutissarsiummut, nunap taamatut annertutigisumik pinngitsoorsinnaanngisaanut naleqqiullugu aalajangiinerit aalajangiiffiginissaannut sapinngisamik pitsaanerpaamik tunngaveqarnissamik kissaateqarneq. Taamatut tunngavimmik pilersitsisinnaanermut pingaarpoq soqutigisaqatigiinniit isummersuutininik tigusinissaq, taamaaqataanilli annertuumik pingaaruteqarluni immikkut ilisimasallit attaviitsut ilanngussaqaarnissaat.

Aamma allaffissorneq peqatigisaanik annikillineqassappat maannakkut allaffeqarfiup qaavatigut sulii allamik allaffissornissamut pisariaqartitsisoqarnerisigut aperisoqarsinnaavoq.

Ingerlatsivimmi allaffissornikkut aningaasartuutit killeqartinnissaat Naalackersuisut assut maluginiartarpaat. Qulaani eqqaaneqartutut ataatsimoorluta isumalluutitta inuiaqatigiit iluanaarutaanerunissaat sapinngisamik pitsaanerpaamik aalajangiisarnernut tunngavinnik pilersitsinissaq suliniuummi siunnersuutigineqartumi siunertarineqarpoq.

KNAPK paragraffit sinnerinut allanik oqaaseqaateqanngilaq

Naalackersuisut tamanna tusaatissatut tiguaat.

Kissaatigineqassapat itinerusumik oqaloqatigiinnissamut KNAPK piareersimavoq eqqartuinissamullu qilanaarpugut.

Naalakkersuisut tamanna tusaatissatut tiguaat.

2.6. QAK

Aalisarnej pillugu Inatsisartut inatsisaata allanngortinneqarnissaanut siunnersuummut QAK-p tusarniaanermi akissuteqarnissamut periarfissinneqarnini qujassutigaa. Aalisarnej Kalaallit Nunaanni inuussutissarsiutini pingaarnersaavoq aamma sulisoqarnermut, avammut niuernermit inuiaqatigiillu aningaasaqarnerannut aalajangiisumik pingaaruteqarluni. Taamaattumik pingaaruteqarluinnarput aalisarnej pillugu inatsimmi allannguinerit inuussutissarsiutip ineriartortinneranut ikorfartuinissaat, aamma isumalluutinik piujuartitsisumik aqutsinerup qulakkeerneqarnissaa. Kalaallit Nunaanni pissutsinut immikkuullarissunut malittarisassaliorerup aqutsinerullu naapertuuttuullutik erseqqissuunissaannik paasiuminartuunissaannillu sulisoqarnissaanut QAK aamma isumaqataavoq.

Naalakkersuisoqatigiit isumaat naapertorlugu aalisarnej pillugu inatsisit allanngorneqassanngitsoq QAK-ip oqariartuutigaa. Allannguutit pillugit siunnersuummik maannakkut saqqummiussisoqarmat, QAK isumaqarpoq, aalisarnerup aningaasarsiornikkut akilersinnaaneranut aamma sinerissap qanittuani aalisarnerup ineriartortinneqarnissaanut sinaakkutit piviusumik pingaaruteqartunik allannguiffiginissaannut periarfissat siunnersuutip massakkut ilusimigut malunnaatilimmik maangaannartikkai. QAK-mit maluginiarneqarpoq allatanik naqqissukkat kiisalu allannguutit amerlanertigut allannguinerne imaqartut kiisalu Aalisarnej pillugu Siunnersuisoqatigiit aamma immikkut ilisimasalinnik siunnersuisoqatigiinnik nutaanik pilersitsinermut tungasuullutik.

Inatsimmik allannguneq pisassiissutininu nuussisarnernik atuinissamullu pisussaaffimmik sammisaqassasoq QAK-mit qilaarineqarsimagaluarpoq. QAK-p isumaa malillugu aalajangersakkat taakku aalisartut aalisarnerup siunissamut ungasinnerusumut pilersaarusiornissaannut, qajannaatsumik ingerlatsinissaannut aamma piviusorsioortumik aningaasalersuinissaannut tunngaveqarnissamut pingaaruteqarluinnarput - pingaartumik raajarniarnermi sinerissallu qanittuani aalisarnermi. Taamaattumik QAK-p innersuussutigaa pisassiissutininu nuussisarnernik atuinissamullu pisussaaffik pillugit malittarisassanik nutarterinissamik siunnerfeqartumik (immikkut inatsisitut ataatsimoortutut) Naalakkersuisut piaartumik saqqummiussissasut, allannguinerillu Aalisarnej pillugu Siunnersuisoqatigiit kattuffiillu soqutigisallit attuumassuteqartut oqaloqatigalugit ilusilersorneqassasut.

Oqaaseqaatit taakku tusaatissatut Naalakkersuisunit tiguneqarput, tassami aalisarnej pillugu inatsimmi atuinissamut pisussaaffik pillugu malittarisassat ilusilersorneqarnerini sapinngisamik pitsaanerpaamik inuussutissarsiutip eqaallisarneqarnerata aamma aalisarnermut inatsisip ilusilersorneqarnerani piviusumik ingerlataqartut imminnut

ataqatigiinnissaannik kissaatigisaq tunngaviummata pingaarutillit: tassalu pisassiissutininik pigisanik piginnittup pigisani nammineq atussagai. RG-p oqaaseqaatai naammasseriarniarlugit ingerlataqartut ataasiakkaat atuinnissamut pisussaaffiinnik atorunnaarsitsineq periarfissaasinnaavoq, ingerlataqartorlu piviusumik ukiumut pisassiissutiminik attartortitsisinnaassalluni.

Siunnersuutip maannakkut Aalisarnek pillugu Siunnersuisoqatigiit pillugit sinaakkutit allanngortinneri peqatigisaanillu siunnersuisussanik nutaanik "Aalisarnerup Piujuartitsisumik Ineriartortinnissaanut Siunnersuisoqatigiinnik" pilersitsinissaq uparuassallugu QAK immikkut pissutissaqarpoq.

QAK-p isumaa malillugu tamanna tassaavoq inatsisissatut siunnersuummi allannguutini tunngaviunerpaanut ilaasoq. Aalisarnek pillugu Siunnersuisoqatigiit saniatigut siunnersuisartussanik nutaanik pilersitsisoqarnissaa, peqatigisaanillu Aalisarnek pillugu Siunnersuisoqatigiit maannakkut inissisimanerisa sanngiillisinneqarnissaat tamatumunnga peqqutaapput, tassami Naalakkersuisut siunnersuisoqatigiit oqaaseqarnissaannik peqqusisinnaajunnaarlutik piumaffiginniinnarsinnaangussammata. QAK isumaqarpoq taamatut marloqiusamik allannguneq pillugu peqataasitsineq, inatsisit malillugit, paasiuminassuseq pillugit aamma inuussutissarsiutit pillugit sulinermut qanittumik ilisimasat immikkullu ilisimasallit siunnersuisarneri oqimaaqatigiinnersut pingaarutilinnik apeqqusiinissamut tunngaviliisut.

Suliatigut aamma aalisarnermi aningaasaqarnikkut aalajangiinissamut tunngaviit nukittorsarnissaannik pisariaqartitsisoqarsinnaanera QAK-mit akuerineqarpoq. Tamannali ima pissanngilaq aaqqissugaasumik inuussutissarsiortunik oqaloqateqartarnek sanngiillisinneqarluni. Aalisarnek pillugu Siunnersuisoqatigiit immikkut atuuffeqarput, tassami siunnersuisoqatigiit malittarisassanik sulinikkullu kingunerisanik suliaqartunik ingerlatsisut katersortarmagit. Peqatigisaanilli siunnersuisoqatigiinnik nutaanik pilersitsisoqarniarpat, erseqqilluinnartariaqarpoq taassuma Aalisarnek pillugu Siunnersuisoqatigiit taarsissanngikkai, siunnersuisoqatigiit pingaaruteqarneri sakkukillissanngikkai aamma inuussutissarsiortunik toqqaannartumik tusarniaasarneq killilerniarlugu tunngavilersuutitut atussanngikkai. Akerlianilli inatsisip allanngortinnerata suliat erseqqissumik agguarneri, innersuussutit pillugit ammasumik ingerlatsineq aamma siunnersuisoqatigiit marluk taakku akornanni aaqqissuutamik iliuuseqaqatigiittarnissaq qulakkeertariaqarpai.

Pineqarteq § 54 – Aalisarnek pillugu Siunnersuisoqatigiit pillugit aalajangersakkat allanngortinneri

§ 54, imm. 2-p allanngortinneranut QAK akerliuvoq, tassami Aalisarnek pillugu Siunnersuisoqatigiinnit oqaaseqaatinik pissarsiniarnissaminnut Naalakkersuisut pisussaaffeqarunnaassapput, "taamaallaallu" siunnersuisoqatigiit oqaaseqaateqarnissaannik noqqaaginnarsinnaassallutik.

Aalisarneq pillugu Siunnersuisoqatigiit tassaapput inuussutissarsiortut, kattuffiit ingerlatsiviullu akornanni sulinermt tunngasunik oqaloqatigiiffik pingaarutilik, ataqatigiissaarinnittartoq ajornartorsiutinillu aaqqiisarfiusartoq aamma aalajangiinissanut tunngavinnik pitsaannerusunik tapersiisartoq. Taamaattumik malittarisassaliorneq, pisassiissutit, ilusitigut ineriartortitsineq aamma sinaakkutitigut atukkanik malunnaatilinnik allannguinerit pillugit pingaaruteqartuni Aalisarneq pillugu Siunnersuisoqatigiinnik Naalakkersuisut tusarniaasarnerat aalajangiussimaneqassasoq QAK-p innersuussutigaa. Aalisarneq pillugu Siunnersuisoqatigiinni (oqartussanilu taamaaqataani) sulineq nalinginnaasumik nipangiusimasussaataitanerup ilaatilerneranut QAK aamma akerliuvoq. Tusarniaanerit ingerlannerini atortussat tamanut nassiussuunneqartarput, isummat isiginneriaatsillu amerlanerpaat ilaatinneqarnissai pingaaruteqarput. QAK-p innersuussutigaa ammasuuneq aallaaviussasoq, isertuussisinnaanerlu aalajangersimasumik killilimmillu pisariaqartinneqartuni taamaallaat atorneqartassasoq (soorlu inuit ataasiakkaat pillugit paasissutissat imaluunniit niuernermt isertuussassat).

Aalajangersakkami imm. 2-mi takuneqarsinnaasutut sammisat tunngaviusut pillugit Naalakkersuisut Aalisarneq pillugu Siunnersuisoqatigiinnut ilisimatitsissaaq, aamma imm. 3 malillugu siunnersuisoqatigiit namminneerlutik suliniuteqarnertik malillugu sammisanik suliaqarsinnaallutillu taakku pillugit oqaaseqaateqarsinnaapput. Siunnersuisoqatigiit oqaaseqaateqarnissaannut periarfissaq taamaalilluni millineqanngilaq tamannalu tunngavigalugu siunnersuut siunnersuisoqatigiit piginnaasaannik killilersuissasoq Naalakkersuisut isumaqanngillat - tamannalu siunertaanngilaq.

Naalakkersuisut tusarniaanermi akissutit tiguneqartut tunngavigalugit inatsimmi oqaaseqatigiit attatiinnarniarlugit aalajangerput, taamaalillunilu siunnersuisoqatigiit oqaaseqaateqarnissaannik qinnuiginninneq pisussaaffiulerluni.

Naalakkersuisut paasinninnerat naapertorlugu nipangiusissussaataaneq pisortat ingerlatsineranni suliassat sularineqartarnerat pillugu inatsit malillugu pisuni taamaallaat atuuttartussaasoq. Tamanna ima paasineqassaaq; pisussaaffik nalinginnaasuunngilaq, paasissutissalli immikkuullarissut pineqartillugit atuuttassalluni, matumani QAK-mit eqqaaneqartut ilanngullugit.

Pineqartoq § 54 a: ”Aalisarnerup piujuartitsisumik ineriartortinnissaanut siunnersuisoqatigiit”

Aalisarnermt ineriartorneq pillugu suliatigut siunnersuinerup nukittorsarneqarnissaa QAK-mit tapersersorneqarsinnaavoq, matumani aalisarnermt aningaasarsiorneq ilanngullugu. Peqatigisaanik QAK-mit erseqqissarneqarpoq immikkut ilisimasallit siunnersuisoqatigiit inuussutissarsiutinik maannakkut oqaloqateqartarnek taarsissanngikkaat imaluunniit sanngiillisissanngikkaat. Siunnersuisoqatigiit sulinerat, paasissutissanut tunngaviusut innersuussutillu pillugit ammasumik pissuseqarnissap qulakkeerneqarnissai

aalajangiisuulluinnartussaassapput kiisalu Aalisarnej pillugu Siunnersuisoqatigiinnik erseqqissumik iliuuseqaqatigiittarneq pilersinneqassalluni.

QAK-mi aamma oqaatigineqarpoq siunnersuisoqatigiinnik pilersitsineq pisortanut aningaasaqarnikkut allaffissornikkullu kinguneqarnissaa naatsorsuutigineqartoq nassuiaatini allassimanera maluginiarneqartoq, matumani ukiumut 1-2 mio. kr.-inik aningaasartuuteqarneq kiisalu ukiumut $\frac{1}{4}$ – $\frac{3}{4}$ -ip missaanik allattoqarfimmi sulisoqarnissaanik pisariaqartitsineq ilanngullugit. QAK-p innersuussutigai siunnersuisoqatigiit suliassaat, pilersuinerat missingersuutitigullu sinaakkutissaat taamatut allannguinerup akuerinnginnerani erseqqissumik allaaserineqassasut, aamma aningaasat atorneqarneri pillugit ammasumik pissuseqarnissaq qulakkeerneqassasoq.

QAK-p minnerpaamik piumasaqaatit makku innersuussutigai:

- Siunnersuisoqatigiit nalunaarusiaat/innersuussutaat aamma periusiatigut tunngavii pillugit tamanut ammasoqassasoq (pisariaqassappat minitaartarluni).
- Attuumassuteqarpallaarneq soqutigisallu akerleriinneri pillugit malittarisassat, matumani pisortat soqutigisaasa nalunaarutigineqarneri ilanngullugit.
- Amerlanerusunik innersuussuteqarnermi aqqissugaasumik Aalisarnej pillugu Siunnersuisoqatigiit ilanngunneqartassasut, taamaalilluni sulinermit misilittakkat sumiiffinnilu pissutsit aalajangiinissamut tunngavinni ilanngunneqartassapput.
- Katitigaanermi, arlaannaannut attuumassuteqannginneq aamma Kalaallit Nunaanni aalisarnermi piviusumik sulineq immikkut pillugu ilisimasaqarneq qulakkeerneqassapput.

Immikkut ilisimasallit siunnersuisoqatigiit sulinerat pillugu malittarisassanik erseqqinnerusunik aalajangersaasoqartariaqartoq Naalakkersuisut isumaqataapput. Aalajangersakkami imm. 3-mit aamma takuneqarsinnaavoq siunnersuisoqatigiit suleriaasissaannik aalajangersaasoqarsinnaasoq. Aamma imm. 4-mit takuneqarsinnaavoq suliassat, katitigaaneq il.il. pillugit malittarisassanik erseqqinnerusunik Naalakkersuisut aalajangersaasinnaasut. Tamanna pillugu nalunaarummik Naalakkersuisut atulersitsippata tulluarnepaassaaq.

Pineqartoq § 3, nr. 15: "Piareersaaneq" pillugu nassuiaat

QAK-mit maluginiarneqarpoq "piareersaaneq" pillugu nassuiaatip allanngortinneqarnissaa siunnersuutigineqartoq, taamaalilluni qerititsineq taaguummumut ilaajunnaarsinneqassalluni. Tunisinermut avataasiorlunilu aalisarnermut naleqqiullugu inatsisitigut inissisimanerup nassuiarneqarnissaannik pisariaqartitsisoqarnera pillugu QAK paasinnippoq. Peqatigisaanik allannguut Kalaallit Nunaanni nunami tunisassiornermut naleqalersitsinermullu iluanaarutininik ajoqutaassanngitsoq pingaartuuvooq. Taamaattumik QAK innersuussuteqarpoq ingerlatsinerup eqaallisarneqarnera sumiiffimmilu naleqalersitsiniarnerup imminnut oqimaaqatigiissittuunissaannik Naalakkersuisut tamatuma kingorna qulakkeerinnittariaqartut.

Naalakkersuisut isumaqarput siunnersuut aqqutigalugu malunnaatilimmik eqaallisaanissaq periarfissiisoqartoq. Siunnersuut aqqutigalugu pisat angallammi qeritinneqartutut imaluunniit sikulersorneqartutut tunineqassanersut inuussutissarsiortut nammineq naliliisinnaalissapput, soorlu aamma tulaassinerit nunami suliffissuit peqatigalugit tulluarsarneqarnerusumik ataqatigiissarneqarsinnaasut.

Sumiiffinni naleqalersitsisinnaanerup qulakkeerneqarnissaa Naalakkersuisunit aamma siunissami assut pingaartinneqarpoq, Naalakkersuisullu paasinninneri naapertorlugit aalisarneq pillugu inatsimmi § 3, nr. 15-p allanngortinnerani tamanna iluaquserneqartussaassasoq.

Pineqartoq § 3, nr. 27 aamma § 5 – Nakkutilliinermi oqartussat

QAK-mit siunnersuutip nakkutilliinermi oqartussat pillugit taaguummik/nassuiaammik allannguisoqarnera aamma § 5-p tulluarsarneqarnera maluginiarneqarput.

Oqaaseqaat taanna Naalakkersuisunit tusaatissatut tiguneqarpoq.

Pineqartoq § 10 – Umiatsiaararsorluni aalisarnermi inuttut peqataanissaq pillugu piumasagaatip atorunnaarsinneqarnera

Umiatsiaararsorluni aalisarnermi inuttut peqataanissaq pillugu piumasagaatip atorunnaarsinneqarnerata malitsigisaanik ingerlatseqatigiiffiit anginerusut umiatsiaaqqanik atortussanillu piseriarlutik ingerlatseqatigiiffiup pisassiissutaanik aalisartussanik aalisartunik atorfinitsitsisinnaaneri QAK-mit ernumassutigineqarput.

Tamanna sinerissap qanittuani aalisartut ataasiakkaat namminersorsinnaanerannut aamma namminneq aalisarsinnaaneritut aalisartuusinnaanerinullu periarfissat pilliutigalugit pisinnaapput. Allannguutissatut siunnersuutip ilanngunneqartup piviusumik kingunerisinnaavai aalisartut akissarsissutigalugu sulisunngorsinnaanerit namminneq aalisarnermik suliffeqarfiutimik ineriartortinnissaannut piviusumik periarfissaqaratik. QAK-mit taakku pingaartumik ajornartorsiutitut isigineqarput, peqatigisaanillu aalisartut ataasiakkaat aningaasalersuinissaminut periarfissai assut unamminartutut isigineqarlutik. Taamaattumik aalisarnerup siunissami aningaasalersornissaanut Naalakkersuisut piaarnerpaamik sinaakkutinik erseqqissunik saqqummiussinissaat pingaartuusoq QAK-p erseqqissarpaa - pingaartumik sinerissap qanittuani aalisarneq eqqarsaatigalugu - taamaalillutik sulisussarsiortnerit, kinguaariit nikinnerisa nutarterinerillu aningaasaatilissuarnit atorfinitsitsiortnerit piviusunngunnginnissaat eqqarsaatigalugit.

QAK isumaqarpoq allannguneq umiatsiaararsorluni aalisarnermi ukunatigut killilersuissasoq:

- Umiatsiaararsorluni aalisarneq (angallatit 6 meterit inorlugit) aallaaviatigut CVR-imi immikkoortutut inuttut nalunaarsorneqarsimasunut tunngatinneqartariaqarpoq (inuup ataatsip suliffia).

- Ingerlatseqatigiiffieriaaseq I/S erseqqissumik atorneqarsinnaasariaqarpoq, taamaalilluni aalisartut assigiimmik atugaqarlutik aalisarneq pillugu ataatsimoorsinnaallutik.
- Umiatsiaararsorluni aalisarnermi suliffeqarfissuit aqutsinerannut illersuineq eqqunneqartariaqarpoq, soorlu sumiiffinni/pimoorussisumik piginnittuunissaq pillugu aamma/imaluunniit ataatsimit aqunneqartut umiatsiaaqqat/akuersissutit amerlassusiisa qummut killeqarnissaat pillugu piumasaqaateqarnerit aqputigalugit.

Ingerlatseqatigiiffiit annerusumik peqataalerlutik ineriartornerup malinnaavigeqarnera Naalakkersuisut kissaatigissappassuk, tamanna, pissutsit tulluannngitsut atuutilissagaluarpata, ingerlaavartumik nalilersuisarluni sukkasuumillu iluarsisooqarnissaanik periarfissaliilluni minnerpaamik malinnaavigineqartariaqarpoq.

Umiatsiaaqqat 6 meterit aamma taakkunannga naannerit ingerlataqartullu allat aalisariutaatiminnik tamanik nalunaarsuisussaataitanerannik piumasaqaateqarnerup kingunerasaanik assigiinngisisitsisoqarnissamut tunngavissaqanngitsoq Naalakkersuisut aalajangiusimavaat. Saniatigut allannguuteqarnermik qulakkeerneqarpoq, aalisartut akuersissutaatillit, pissutsinik assigiinngitsunik soorlu nappaammit, ilaqutariinnik unammillertunit il.il. nammineq aalisaqataanissamut akornuserneqartut, akuersissutaatertik atorsinnaaginnassavaat akuersissummik alla aalisartinneratigut tunisitinneratigullu. Tamanna pingaartumik PNNP-mik aalisarnermik sulialinnut atuuppoq, allannguinnermi tunngavilersuutit qulaani taaneqartut pissutigalugit atuisinnaaneq tamakkerlugu atorsinnaatinagu pisassat ilaasa annaaneqarnerisigut taamatut inissisimalernissaq pinngitsoorniarlugu.

§ 10-p allanngortinnerata kingunerisinnaasaanik, QAK-mit allanneqartutut, kingunissat Naalakkersuisunit akuerineqarput. Ineriartorneq Naalakkersuisuinit malinnaaffigeqqissaarneqassaaq, pisariaqartitsisoqartillugu pisarialinnik naqqissuinissaq angusinnaajumallugu.

Pineqartoq § 32, imm. 8 – Inatsisartut immikkut ilisimatinneqartarneri

Inuiaqatigiit aningaasaqarnerinut malunnaatilimmik kinguneqaataasinnaasut pillugit aalajangernerit Inatsisartunut immikkut ilisimatitsissutigineqartarnissaat siunnersuutigineqartoq QAK-mit maluginiarneqarpoq. QAK naliliivoq suliniut taanna pitsaasuusoq, ammasumik pissuseqarnermut naalakkersuinnermillu suliallit tunngaviusumik tunngaveqarneranik ikorfartuisuusoq.

Oqaaseqaat taanna Naalakkersuisunit tusaatissatut tiguneqarpoq.

Pineqartoq § 33 – Tunumi avataasiorluni qaleralinniarnermi pisassiissutinut piffissaliisarneq

QAK-mit maluginiarneqarpoq Tunumi avataasiorluni qaleralinniarnermut piffissaq pisassiissutinik aalajangersaaffigineqartartoq ukiunut qulinut aalajangiunneqassasoq siunnersuutigineqarsimasoq. Piffissaq siumut oqaatigiuminartuutillugu pisoqaraangat aningaasalersuinerit siunissamullu ungasinnerusumut pilersaarusiorsinnaanerit pitsaannerusumik tunngaveqarnissaat iluaquserneqarsinnaasarput. Teknikikkut iluarsineq taanna QAK-p oqaaseqarfigisinnaangilaa.

Oqaaseqaat taanna Naalakkersuisut tusaatissatut tiguvaa.

2.6. SIK

SIK oqaaseqaatissaqanngilaq aamma aalisarneq pillugu inatsisip allanngortinneqarnera aamma (siunnersuutip) akuerineqarnissai inassuteqaatigai.

Naalakkersuisut tamanna tusaatissatut tiguvaa.

2.7 Royal Greenland A/S

Royal Greenland A/S ataani allassimasunik tusarniaanermi akissuteqarpoq.

Imm. 1-7 pillugit

Oqaaseqaatissaqanngilagut.

Naalakkersuisut tamanna tusaatissatut tiguvaa.

Imm. 8, §§ 54 aamma 54a pillugit

§ 54

Aalisarneq pillugu Siunnersuisoqatigiit tusarniaaffigineqassanngitsut, kisiannili taamaaliortoqarsinnaasoq siunnersuummi nassuiaatini oqaaseqaateqarnissamut tunngavissaqanngilaq. Taamatullu allannguinnermut tassunga tunngavissaqanngitsaq takusinnaavarput, taamaalillutalu siunnersuut tapersersinnaanatigu. Manna tikillugu pissutsit pingaarutillit pillugit aalajangiinerit sioqqullugit tusarniaanerit inuussutissarsiortunut saqqummiunneqartarnerat sulit tulluartaavoq. § 54 maannatut iluseqartillugu attatiinnarneqarnissaa innersuussutigaa. Akerlianilli tamatumunnga pissutissaqartut naliliisoqarpat siunnersuisoqatigiit suleriaasiata allanngortinneqarsinnaaneranut ammaavugut.

Aalajangersakkami imm. 2-mi takuneqarsinnaasutut sammisat tunngaviusut pillugit Naalakkersuisut Aalisarneq pillugu Siunnersuisoqatigiinnut ilisimatitsisartussaavoq, aamma imm. 3 malillugu siunnersuisoqatigiit namminneerlutik sammisanik suliaqarsinnaapput taakkulu pillugit oqaaseqarsinnaallutik. Siunnersuisoqatigiit oqaaseqaateqarnissaannut periarfissaq taamaalilluni millineqanngilaq tamannalu tunngavigalugu siunnersuut siunnersuisoqatigiit piginnaasaannik killilersuisutut Naalakkersuisut isiginngilaat - tamannalu siunertaasimanngilaq.

Naalakkersuisut tusarniaanermi akissutit tiguneqartut tunngavigalugit inatsimmi oqaaseqatigiit attatiinnarniarlugit aalajangerput, taamaalillunilu siunnersuisoqatigiit oqaaseqaateqarnissaannik qinnuiginninneq pisussaaffiulerluni.

§ 54a

Siunnersuutigineqartut siunnersuisoqatigiinnik pilersitsiniartoqarnera tunngaviusumik Royal Greenland A/S akerliliisutissaqanngilaq. Taamaattorli kissaatiginarpoq siunnersuisoqatigiit suliassa qarfiata inatsisip oqaasertaani aamma/imaluunniit nassuiaatini sukumiinerusumik allaaserineqassasut. Aalisarnek pillugu Siunnersuisoqatigiit Naalakkersuisunik siunnersuisartuusut siunnersuisartunit taakkunannga taartaalernissaat anguniarneqarsimappat, anguniagaq taanna tapersersinnaanngilarput. Aalisarnek pillugu Siunnersuisoqatigiit pissutsit malunnaatillit pillugit illuatungitut tunngaviusumik tusarniaaffigineqartarnera suli attuumassutilittut isigaarput, taamaattorli siunnersuisoqatigiit siunnersuutigineqartut aamma tusarniaaffigineqartarnissaannik aamma siunnersuutini saqqummiussisarnissaannik pillugit oqaaseqaatissaqanngilagut - kisianni soorlu oqaatigereerippat killilersorneqarnerusumik aamma suliassaasa sukumiisumik allaaserinneqarnissaannik tunngaveqartoqartariaqarpoq.

Immikkut ilisimasallit siunnersuisoqatigiit sulinerat pillugu malittarisassanik erseqqinnerusunik aalajangersaasoqartariaqartoq Naalakkersuisut isumaqataapput. Aalajangersakkami imm. 3-mit aamma takuneqarsinnaavoq siunnersuisoqatigiit suleriaasissaannik aalajangersaasoqarsinnaasoq. Aamma imm. 4-mit takuneqarsinnaavoq suliassat, katitigaaneq il.il. pillugit malittarisassanik erseqqinnerusunik Naalakkersuisut aalajangersaasinnaasut. Tamanna pillugu nalunaarummik Naalakkersuisut atulersitsippata tulluarnepaassaaq.

Aalisarnek pillugu Siunnersuisoqatigiinni ilaasortat illuatungitut tusarniaaffittut suli ilaassapput, siunnersuisoqatigiillu taamatut tusarniaanermi suli akissuteqartinneqartassapput, tamanna tulluartaatut isigineqaraangat.

Allat

Aalisarnek pillugu inatsimmik nalilersuinissamut maannakkut alloriartoqarmat ukiumut pisassiissutit tuniniarneqarsinnaanerini aamma pisassiissutini nuussisinnaanermut killilersuinerit akuerineqarsimasut aamma iluarsineqartariaqarput. Maannakkut aalajangersakkat aalisarsinnaanermut pisinnaatitaaffinnik annerpaamik tunineqarsinnaaneri pillugit Aalisarnek pillugu Ataatsimiititaliarsuup inassuteqaataanut naapertuutinngillat, taakkuami inuiaqatigiinnut iluanaaruteqarfiunerpaasarpud.

Aamma sinerissap qanittuani raajarniarnermi umiarsuaatillit, ingerlatseqatigiiffiup aalisarnissamut piginnaasaanut naapertuuttut pisassiissutini nammineq piviusumik pigisaqanngitsut naleqqutinngitsumik sakkortuumik eqqorneqarput, raajat

pisarineqarsinnaasut tamarmiusut pissutigalugit ikinnerusunik ukiumut pisassiissuteqalerner
peqqutigalugit.

Sinerissap qanittuani raajarniutit ukiup naalernerani qaammatini pingasuni-sisamani
uninngasalernissaat naatsorsuutigineqarpoq, tamannalu ukioq mannamiit
atuutilissangatinneqarluni. Tamanna aalisarneq pillugu inatsisip allanngortinneqarneratigut
pinngitsoortinneqartariaqarpoq, tassami umiarsuaatillit pineqartut pisassiissutini
tunniussinissamut periarfissaqartunnit umiarsuaatilinnit allanit pisassiissutini
pissarsisinnaassapput. Tamanna nunami raajaleriffinnut tunisassiassanik pilersuiner
mut malunnaatilimmik iluaqutaassaaq, taakkumi tunisassiassatigut tunngaviit ukiuni kinguller
ni malunnaatilimmik ikillisimammata. Aamma tamanna tunngavigalugu raajarniutit
aalisarnissamut periarfissaqarnatik uninngaannarnerat akuerineqarsinnaanngilaq.

*Oqaaseqaatit taakku tusaatissatut Naalakkersuisunit tiguneqarput, tassami aalisarneq pillugu
inatsimmi malittarisassat ilusilersornerini atuinissamut pisussaaffik inuussutissarsiummi
sapiinngisamik pitsaanerpaamik eqaallisarneqarsinnaanera aamma inatsisit piviusumillu
ingerlataqartup imminnut ataqatigiissuunissaannik kissaateqarneq pingaartinneqarsimapput:
pisassiissutini pigisanik piginnittoq nammineq taakkuninnga atuissasoq. RG-p
oqaaseqaataasa naammassineqarsinnaaneri anguniarlugit ingerlataqartut ataasiakkaat
atuinissamut pisussaaffiik atorunnaarsitsinissamik periarfissaqarneq, aamma
ingerlataqartup piviusumik ukiumut pisassiissutiminik attartortitsisinnaanerninik
periarfissaqalersitsisoqarpoq.*

*Tunngaviup eqartumik aqunneqarnera tulluanngitsunik kinguneqarsinnaaneri
Naalakkersuisut arajutsisimanngilaat, aamma pissutsit taakku pillugit inuussutissarsiortunik
oqaloqateqarnissaa piareersimaffigaat.*

Aalisarneq pillugu inatsimmi pisassiissutit qummut killii pillugit aalajangersakkat imatut
aaqqissuunneqarsimanersut aalajangersakkami malittarisassaliornermi siunertarineqartutut
taakku piginnittuunermut nakkutilliinermullu piviusumik tunngasuunersut naliliinissamut
Naalakkersuisoqarfik kaammattorneqarpoq. Taamaattoqanngippat aalisarneq pillugu
inatsimmik maannakkut nutarterinermut atatillugu pisariaqartunik aamma
allannguisoqarnissaa pissusissamisuussaaq.

*Naalakkersuisut isumaqarput inatsimmi pisassiissutit qummut killii pillugit aalajangersakkat
imatut aaqqissuunneqarsimasut aalajangersakkami malittarisassaliornermi
siunertarineqartutut taakku piginnittuunermut nakkutilliinermullu piviusumik tunngasuusut.
Taamaattorli RG-ip taamatut oqaaseqaamminik erseqqissaallunilu itisiliinissaanut
Naalakkersuisut qilanaarput.*

2.7. Sikuaq Trawl A/S aamma Niisa Trawl A/S

Aalisarneq pillugu Inatsisartut inatsisaata allanngortinnissaanut siunnersuut Sikuaq Trawl A/S-ip aamma Niisa Trawl ApS-ip misissorsimavaa. Aalisarneq pillugu Siunnersuisoqatigiinnut (§54) aamma immikkut ilisimasallit siunnersuisoqatigiit nutaat (§54 a) tunngasumik siunnersuummut taamaallaat isummersorpugut.

Aalisarneq pillugu Siunnersuisoqatigiit

Sikuaq Trawl A/S-ip aamma Niisa Trawl ApS-ip Aalisarneq pillugu Siunnersuisoqatigiit immikkorluinnaq pingaaruteqartutut isigaat, aalisarnermik inuussutissarsiortuniit sinniisoqarluni isummaminik Naalakkersuisunut saqqummiussisinnaasoq. Tamanna Aalisarneq pillugu inatsisip nutaap atuutilernerani piffissami pingaarluinnartuuvog, taassumalu kingunii maanna takuneqarsinnaalerlutik.

§54 imm. 2-mi oqaaseqatigiinnut siunnersuutigineqartunut qularuteqarpugut: Qulequttat pingaarutillit pillugit ingerlaavartumik Naalakkersuisut siunnersuisoqatigiinnut ilisimatitsisassapput, taannalu qinnuigisinnaavaat oqaaseqaateqassasoq tulluuttut pillugit.."

Aalisarneq pillugu Siunnersuisoqatigiinniit oqaaseqaatinik pissarsinissamut Naalakkersuisut pinngitsooratik pissarsiniartussanngimmata aarlerinarsinnaavoq piffissap ingerlanerani Aalisarneq pillugu Siunnersuisoqatigiit pingaaruteqarneri sanngiillissasut. Aamma tulluannigitsunik aalajangiinerit Naalakkersuisunut aarlerinarsinnaallutik, tassa inuussutissarsiuteqartut isumaat pinngitsooratik ujarторneqarsimanngimmata.

Allannguutissatut siunnersuutigineqartut taamaattumik Sikuaq Trawl A/S-imit aamma Niisa Trawl ApS-imit tapersersorneqanngillat, innersuussutigaluguli §54 imm. 1 aamma imm. 2 Aalisarneq pillugu inatsimmi atuuttumi atuutiinnassasoq.

Aalajangersakkami imm. 2-mi takuneqarsinnaasutut sammisat tunngaviusut pillugit Naalakkersuisut Aalisarneq pillugu Siunnersuisoqatigiinnut ilisimatitsissaaq, aamma imm. 3 malillugu siunnersuisoqatigiit nammineerlutik sammisanik suliaqarsinnaallutik taakkulu pillugit oqaaseqaateqarsinnaallutik. Siunnersuisoqatigiit oqaaseqaateqarnissaannut periarfissaq taamaalilluni annikillisinneqanngilaq tamannalu tunngavigalugu Naalakkersuisut isumaqanngillat siunnersuut siunnersuisoqatigiit piginnaasaannik killilersuisoq - tamannalu siunertaasimanani.

Naalakkersuisut tusarniaanermi akissutit tiguneqartut tunngavigalugit inatsimmi oqaaseqatigiit attatiinnarniarlugit aalajangerput, taamaalillunilu siunnersuisoqatigiit oqaaseqaateqarnissaannik qinnuiginninneq pisussaaffiulerluni.

Taamaattorli §54 imm. 3-7-p allanngortinnissaanut siunnersuutigineqartut tapersersorpagut.

Oqaaseqaataat taanna Naalakkersuisut tusaatissatut tiguneqarpoq.

Immikkut ilisimasallit siunnersuisoqatigiit (Aalisarnerup Piujuartitsisumik Ineriartortinneranut Siunnersuisoqatigiit).

Aalisarnermi sulinermit ilisimasat amerlanerit pissarsiarinissaannut Sikuaq Trawl A/S aamma Niisa Trawl ApS tapersersuiuvoq.

Taamaattorli §54 a siunnersuutigineqartoq ersernerluinnartutut isigalutigu. Immikkut ilisimasallit siunnersuisoqatigiit

kikkunnik inuttaqassanersoq, sunik suliaqassanersoq immikkullu ilisimasallit siunnersuisoqatigiit taakku qanoq piginnaatinneqassanersut ersernerlulluni.

Immikkut ilisimasallit siunnersuisoqatigiit taamatut ittut

Kalaallit Nunaanni aalisarneq pillugu siunissami assut sunniuteqalersinnaapput.

Taamaattumik isumaqarpugut taamatut immikkut ilisimasalinnik siunnersuisoqatigiinnik pilersitsinissaq

sioqqullugu sukumiisumik suliaqartoqarnissaa pingaaruteqartoq.

§54 a-mi allannguutissatut siunnersuutigineqartut taamaattumik Sikuaq Trawl A/S-imit aamma Niisa Trawl A/S-imit tapersinngilagut.

Immikkut ilisimasallit siunnersuisoqatigiit sulinerat pillugu malittarisassanik

erseqqinnerusunik aalajangersaasoqartariaqartoq Naalakkersuisut isumaqataapput.

Aalajangersakkami imm. 3-mit aamma takuneqarsinnaavoq siunnersuisoqatigiit

suleriaasissaannik aalajangersaasoqarsinnaasoq. Aamma imm. 4-mit takuneqarsinnaavoq

suliassat, katitigaaneq il.il. pillugit malittarisassanik erseqqinnerusunik Naalakkersuisut

aalajangersaasinnaasut. Tamanna pillugu nalunaarummik Naalakkersuisut atulersitsippata tulluarnepaassaaq.

Tusarniaammut uunga Sikuaq Trawl A/S aamma Niisa Trawl ApS annerunerusumik oqaaseqaatissaqanngillat.